

22 NOV 1997

ARKIB NEGARA BANGUNKAN KAMPUNG KELAHIRAN DR MAHATHIR

ALOR SETAR, 22 Nov (Bernama) -- Arkib Negara akan memelihara dan membangunkan semula sebuah perkampungan Melayu di Lorong Kilang Ais, lokasi rumah kelahiran Perdana Menteri Datuk Seri Dr Mahathir Mohamad.

Ketua Pengarahnya Habibah Zon berkata, untuk tujuan itu Arkib Negara telah mengambil alih kawasan seluas 0.4 hektar berhampirannya untuk dibangunkan sebagai destinasi pelancongan yang lebih menarik.

"Kawasan ini akan dibangunkan dengan ciri-ciri perkampungan yang terdapat semasa Perdana Menteri dilahir dan dibesarkan," katanya di majlis penyampaian hadiah pesta melukis sempena ulangtahun ke-5 perasmian Rumah Kelahiran Mahathir Mohamad di sini, hari ini.

Katanya sebuah kilang ais yang beroperasi berhampiran rumah itu sejak Dr Mahathir tinggal di situ lagi turut dipelihara dengan menjadikannya sebagai sebuah galeri perusahaan ais.

Habibah berkata, kilang itu telah menghentikan operasi pada tahun lepas dan segala peralatan dan model blok-blok ais akan dipamerkan sebagai daya tarikan pelancong.

Seramai 127 pelajar dari sekolah rendah dan menengah mengambil bahagian dalam pertandingan melukis potret dan rumah kelahiran Dr Mahathir. --

BERNAMA

MN AKD